

liunt. Præter has etiam in agro Volaterrano multæ sunt aquæ medicatæ. præsertim inter Castrum Novum & Murantium, ubi balnea morborum nominibus certis insignita visuntur. Non procul Leccia clarissimæ aquæ sunt, quæ salitæ & affatim potæ mirum in modum corpora malis plurimis emundant. Sterilitatem quoque mulieribus auferre creduntur, fœcunditate reposita. Sunt præterea in hoc districtu oppidula, *Mons Rotundus, Iustinianum, Saxeta, Soveretum*, vino, oleo, frugibusque aliis abundans: *Moscona*, quæ tota ferè collapsa pastorum pecudumque facta est receptaculum. Oppidum olim fuisse insignie testantur magna quæ hic inveniuntur marmorum frusta, fractæ columnæ, statuae mutilæ, eximii fontis vestigia non obscura, semirutique ejus muri quadrato lapide, ingensque cisterna. Multa quotidie hic reperiuntur Antiquitatis monumenta, plerumque nummi. Via, qua Senam itur Volaterris, occurrunt *Mons Micivulus, Spicciaiola, Castrum Novum de Geminiani*, vicinusque *Collis Elsanæ vallis* qui in ditione Senensium est, & *Abbatia vicus*, vernaculè *la Badia*, inter fines Florentinorum & Senensium. Volaterris Senam euntibus à tergo celfo in jugo *Sullanum* apparet. Quadrata loci species est: angulos singulos munitæ te-

nent arces, quarum quinta in medio oppidi cæteris major, puteum habet aquæ vivæ altitudinis summæ. Aditus ad oppidum difficilis, arcta sinuosaque via, latitudinis haud supra pedes ternos, opere saxeo incisa, montem ambiens. Collem hunc saxosum murus cingit insignis, à medio colle per circuitum in vertice desinens. Syllani nominis originem ad Syllam conditorem ipsi incolæ referunt: sed Volaterranus oppidum à Petroniis Senensibus ædificatum scribit. A Syllano M. P. VI in amœno colle oppidum est *D. Armatii*, & septimo inde lapide oppidum *Cassoli*, in quo statua C. Cornelii Syllæ dictatoris marmorea cernitur. Altero à Volaterris lapide oppida sunt *Matella, Roncollaque*, & versus mare *Guardistallum, Mons Scutarius*, vernaculè *Monte Scudai, Quercetum*, & hinc tertio lapide *Ripabella*.

Burgum S. Sepulchri, urbs Vmbriæ nulla antiquitatis nota insignis, diuque sub Ecclesiastico dominio versata, ab Eugenio IV aureorum XII millibus Florentinis fuit oppignorata.

Mons Politianus, nobile oppidum, frequensque, amœno in colle ac omni optimorum fructuum genere perfæcundo, præsertim vero generosis vinis; quondam Senensium ditionis, sed à Julio II P. R. Florentinis traditum.

